

IMMIGRAZIOA. Laguntza taldeek eta Espainiako eta Nafarroako gobernuek lan batzordea osatu dute gaia aztertzeko

Etorkinen egoera egunetik egunera okertzen ari dela salatu dute

Gobernu ordezkariak dio egoera ez dela txarra

Alberto Barandiaran | IRUÑEA

Gure artean bizi diren etorkinen bizi-baldintzak «egunetik egunera okertzen» ari dira, eta haietako asko nola itzuli pentsatzen hasiak dira, nahiz eta bidaia zerekin ordaindu ez daukaten.

Nafarroan, esate baterako, 5.000-6.000 lagun bizi dira lan egiteko tramiterik egin ezinean, eta bertan jarraitzeko arazo handiak dituztela.

Etorkinekin lan egiten duten gobernu kanpoko laguntza taldeek hamar puntuko proposamena aurkeztu zioten atzo Gobernu Ordezkaritzari egoerari irtenbidea emateko, eta ordezkari zaburuak agindu zuen aztertuko zituela.

Bost bat urte legeztatzea lortzeko

Laguntza erakunde izenean, Vicente Blasco Caritaseko ordezkariak gogoratu zuen lan baimenak jada ez direla tramitatzen ari, hala erabaki baitzuen Espainiako Gobernuak joan den urtarrilean, eta horren on-

dorioz etorkin askok bost bat urte eman beharko dituztela ia klandestinitatean.

Blascok esan zuenez, Nafarroan badira dagoeneko 18 bat etorkin kanporaketa proposamena jaso dutenak, baina ez da jakin norbait hartu eta atzerrira bidali ote duten.

«Jendea sartzen ari da, baina ohiko bidea itxi du Gobernuak, eta hiru eta bost urte bitartean itxaron beharko dute haietako askok lanak berriro egin ahal izateko».

Harremanak hautsi, «kaos administratiboa» dela eta

Joan den urrian etorkinekin lan egiten duten taldeek harremanak hautsi zituzten Gobernu Ordezkaritzarekin, bertan zegoen «kaos administratiboa»-rengatik. Gero, Nafarroako Gobernuaren bitartekaritza eskatu zuten, eta joan den hilean bilera egin zuten Ongizate Departamentuko goi karguekin. Horren ondorioz izan zen atzoko bilera.

Calixto Aiesa Ongizate kontseilariak adierazi zuen, bilera



LANDER F. ARROIABE/ARGAZKI PRESS

Etorkinekin lan egiten duten erakundeetako ordezkariak, bilera egin ondotik.

DATUA

Kaosik ez dagoela diote

Txostenak. Juan Carlos Iribas Espainiako Gobernuko ordezkariak esan zuenez, ekainetik 11.000 txosten inguru tramitatu dira, eta bertan errotzeko egindako 5.500 eskaeretatik 800 inguru baino ez dira falta erabakitzeke. «Ez dago kaosik», esan zuen Iribasek.

bukatuta, Nafarroak etorkinak behar dituela, «baina legezko etorkinak, horiek ekartzen dutelako onura, bizikidetzeta eta in-

tegrazioa». Jose Carlos Iribas Espainiako Gobernuaren Ordezkaritzako buruak berretsi zuen atzerititik datozenak «aterpetzeko gogo», eta joan den urteko egoera konpontzen ari zela azpimarratu zuen.

«Ordezkaritzan lan handia egiten ari da: bertaratzeko egindako 5.500 eskaeretatik 800 falta dira erabakitzeke, eta ohiko bidetik zeuden 8.000 txostenetatik 5.000 erabaki dira jada». Iribasek gogoratu zuen, hala ere, etorkinen gaiak Madrilen erabakitzen dituztela, eta proposamenak han aztertuko dituztela.

Hiru hilabete behin bilduko den lan batzordean gaiaren

segimendua egingo da, eta gogoeta bultzatu nahi dute laguntza taldeek urrian aurkeztutako proposamenan inguruan.

Lan txostena, batez ere, administratiboa da, gobernu kanpoko erakundeek tramiteak arintzea nahi dutelako, eta horretarako baliabide gehiago eskatzen diotelako gobernu ordezkariari, baina aferari lotutako beste gai batzuk ere jorratuko dituzte.

Calixto Aiesak nabarmendu zuen «zailtasun handikoak» direla denak, eta Gobernuaren parte-hartzea defenditu zuen, hezkuntza, osasuna eta etxebizitza gaietan, esaterako.

Etorkinen eskubideen aldeko manifestazioa antolatu dute hogeita bat erakundek Donostian

Igor Mujika | DONOSTIA

Paperak eta eskubideak etorkin guztientzat lelopean, manifestazioa egingo da igandean Donostian. Trintxerpen hasiko da protesta ekitaldia, 11:30ean, eta ordu eta laurden geroago amaituko da, Donostiako Bulebarrean.

Deialdi horrekin hogeita bat erakundek egin dute bat: besteak beste, ELA, ESK eta EILAS sindikatuek, eta Caritas, SOS Arrazakeria, Hemen eta Munduan eta Medicus Mundi erakundeek.

Talde horiek guztiek bederatzita puntu dituen manifestua kaleratu dute. Puntu horietatik lau nabarmendu zituen SOS-Arrazakeria taldeko kide Agustín Unzurrunzagak, atzo Donostian eskaini zuen pren-

tsurrekoan. Batetik, etorkinen kupoaren argitarapenak Hego Euskal Herrian bizi diren etorkinei legez lan egiteko aukerarik ez diela uzten azaldu zuen. Etxeko lanak egiteko 180 pertsonakoa da Gipuzkoako kupo; zerokoa Bizkaikoa; Nafarroan sasoiko lanak egiteko ehun pertsonakoa; eta Araban etxeko lanak egiteko 91 pertsonakoa. Horrenbestez, atzerrian bizi eta Gipuzkoa eta Araban etxeko lanak egiteko prest diren 271 pertsonak soilik lor dezakete bizileku eta lan baimena Hego Euskal Herrian.

Bestetik, «iazko araupetze berezian eskatutako 720 lan eta egoitza baimenen erdiak, zortzi hilabete pasatu ondoren, oraindik erabakitzeke daude», salatu zuen Unzurrunzagak. SOS-

Arrazakeriako kideak gaineratu zuenez, lan eta egoitza baimenik ez dutenez, pertsona horiek ezin dute legalez lan egin Euskal Herrian.

Gainera, Europar egiten diren babes eskaera gehienak lehenengo tramitean ukatzen direla adierazi zuen.

Laugarren puntu gisa, Hego Euskal Herrian etorkinentzako babes politikarik ez dagoela salatu zuen. Unzurrunzagak jakinarazi zuenez, babes politika horiek aurrera ateratzea «Eusko Jaurkitzari eta Nafarroako Gobernuari dagokie, eta gobernu horiek ez dute orain arte horrelako politikarik indarrean jarri». Ondorioz, etxebizitzak alokatzea ezinezko egiten zaie etorkinei, edo, kasurik onean, ohi baino gehiago ordaindu behar izaten dute.

Manifestazioa Iruñean, Arrazakeriaren aurkako Egunaren harian

Erredakzioa | IRUÑEA

Berrogeitik gora gizarte erakundek, etorkin taldek eta sindikatuk deituta, manifestazioa izanen da bihar Iruñean, Sarasate Pasealekutik abiatuta, 20:00etan.

Manifestaziorako deia egin duten taldeek salatu nahi dute Atzeritarren Legea egin eta urtebete igaro dela arrazakeria eta xenofobia presente direla gure gizartearen, eta lana eta bizitzeko baimenak lortzeko oztopo eta traba administrazioak daudela.

Atzo emandako prentsurrekoan, etorkinen inguruko taldeek ohartarazi zuten, esaterako, etxebizitzaren

gaiaren inguruan sortutako polemikaz, babes ofizialeko etxetarako zerrendetan etorkinak «ere» sartzen ari zirelako. Polemika «nahia eragindakoa» izan zela uste dute talde horiek.

Halaber, kaleetan eta eguneroko bizitzan dauden xenofobia zantzuak salatuko dituzte, eta baita ijitoek pairatu behar izaten dituzten aurrejuquak ere. «Jende guztia erantzutuz eskubide guztiak eskatzen ditugu, jatorria, kolorea, erlijioa eta kultura gorabehera», esan zuten antolatzaileek.

Deialdia Sos-Arrazakeriak, Paperak Denontzat taldeak eta etorkin eta ijito taldeek egin dute.